

Schnitzel PUNK

2024

Miar händ schwäri Stunda gha, a würllich bösi Krisa.
Schüttelfröscht mit Kotza und Durchfall, ganz a miesa.
Und das, will miar im krassa Clip vur SVP
händ d Martullo müassa mitem Füttla gwagglä gseh.



An Wintersportevent wie ds BIG-AIR brucht halt Schnee,
sait dr aint was gfroget händ, vom BIG-AIR-Komitee.
Doch bloost dr Föhn dur Chur, jedes Jahr a bizli feschter,
isch au dr Schnee vom BIG-AIR bald nur no Schnee vo geschter.
Und wenns dänn nurno föhnet oder wenns nid föhnet schifft,
wird halt aifach Party gmacht und ohni Schänzla kiffet.



Als Regiarigsrot muass ma Wiitsicht praktiziara.
Immer schön druf achta, nid di Falscha zschikaniara.
Bim ainta hät sichs jetz au glohnt, do schtuunt ma gopfertelli,
bim neua Chef vor CATRAM, am Mario Baukartelli.



Parteia sind jetzt froh, will sit neuschem müan si,
wäg dāna kaiba Klimakläber uf zmol nümma grünan si.
Nur d SVP häts immer gwüsst, do kamma nur no schtuuna,
setzt sit je uf Schwizerfarba mitma Stich ins Bruuna.
Hart ischs für dia Grüana, dia schteckend tüüf im Schlamm,
bi dāna isch dr Nama halt scho a biz Programm.
Noch dāra bösa Schlappa könds nur no d Auga riiba,
sind glaub uf dr Strecki ufem Asphalt kläba bliiba.



Unter dr Gürtellinia isch eigentlich tabu.
Doch BH mit Pseudo-Nippla findend miar dr Clou.
Miar händ üs gfrogt, was kunnt als nögschts und sofort tschäggt, aha!
S brucht dām Fall au nö Hösli, woma Lippa läsa ka.



Seniora-Disco isch, jetz müander losa,
wäg verschidna Mainiga um as Hoor ind Hosa.
Dr Start so früah am Zwai, häts ghaissa, segi zimmlich laidig.
Dänn segends noch am Mittagsschlöfli aifach no nid gschmaidig.
Andri hättend Schlager wella, nid so Disco Äktschen
oder wie sichs ghört im Alter, viel meh Sätisfäktschen.



Z Cazis an dr Vehschau händs a Kua prämiart.
Ds Priisgäld hät dr Renzo Bluamathal kassiart.
Sit dā armi Kärli wieder ganz allei muas pfuusa,
schteckt är sini Energie ind Kua mim schönschta Buusa.



Ds RSO vom Löbrümo hät zmol u huara Pflänz.
 Das koga BAKOM git im kaime Radiolizenz.
 Miar wüssend d Mediavielfalt isch für alli wichtig do.
 Aber Hampa, Silvio, Susanne... heissend alli Löbrümo.
 Ändlich saicht jetzt aina ans Bai vor Löbrü-Dynastie.
 Nur gopfnomol, muas das usgrächnet dr Schawinsky si?



Samstignommittag in Chur und Stau, do kriagsch grad d Kriisa.
 Wetsch nu schnäll go poschta und könntsich ins Schtüürrad biissa.
 Ds Problem wird dänn schnäll klar. As isch, do kasch druf wetta,
 dr Tschugger-Kindergarta dra, dia schiiss Verkehrskadetta.
 Schtosch dänn gnärvt, merksch grad, dia kliina Pseudo-Polizishta,
 hättend au no Potenzial als Klima-Aktivishta.
 Drbii gäbts jo viel Gschidders, wod Kind sich könd verwiila.
 Zum Biischpiil bim Obertor im Kreisel Lego spilla.



Z Nani liit am Boda und dr Neni uffra druff.
 As rüttlet und as schüttlet, sisch as riisa huara Puff.
 Ma ghört, wia d Kiefer knackend und wia d Schenkelhäls tüand kröösa.
 Dabi händs nur versuacht im Bus as Venda-Ticket z lösa.
 Ma hät sich nohhär Müah gä mitem Ticketingsystem.
 Jetzt isches ändlich bruchbar, aifach und bequem.
 Für Däppa, wo das glich nid tschäggend, händs an Knopf iipaut.
 Merkends eu, sisch selbsterklärend, s haisst "Däpp in – Däpp out".
 Yupiayee, yupiayee – Stadtbus Chur – Oje!



Dr Süssli froget dr Roger, was koschtet dina Schuah?
 I han viel ztüüra Plunder bschtellt, drum lönds miar z Bern kai Ruah.
 400 Fränkli wär ok zum dina Schlarpa kaufa.
 Dänn könnt d Armee ab sofort üaba, uf da Fälga zlaufa.
 Sind dia Schua dänn dura noch zwai mol exerziara,
 kammes zum Recykliara uf China exportiara.



Miar händ KI gfroget, tuat da Hänna ds Eierlegga weh?
 Und schlotterend d Forella, wenns kalt isch imna See?
 Oder wär isch z Bärn am Frauamangel tschuld?
 Isches ächt dr Jositsch oder gliich dr Pult?
 Chat GPT hät gsait, das segend schwäri Froga.
 As wäri nid seriös, zum do an Antwort woga.
 As well sich au zum Frauamangel nid uf d Äscht us loh,
 spontan hettis susch gsait, as seg eher d Martullo.



Sie händ dr Marti blitzt zwüsched Zizers und Khur Nord.
 Z Masans bim Kreisel träiter, fahrt uf Zizers zugg sofort.
 Vo döt us wieder zugg uf Khur, är weiss halt wiamas macht.
 Will dasmol passter uf, dass är au schön ind Kamera lacht.